



# Жанубий Қозоғистон

janubiy.kz

1991 йил 5 апрелдан чиқа бошлаган  
Сешанба, пайшанба ва шанба кунлари чиқади

2024 йил 2 апрель, сешанба, №36 (3382).

»» Президент

## ОФАТ АЙТИБ КЕЛМАЙДИ

ДАВЛАТ РАҲБАРИ МАМЛАКАТДАГИ СУВ ТОШҚИНИ ЮЗАСИДАН ФАВҚУЛОДДА ЙИГИЛИШ ЎТКАЗДИ



Президент Қасим-Жумарт Тўқаев мамлакатнинг қатор ҳудудларида сув тошқинлари оқибатида юзага келган фавқулодда вазият муносабати билан вазирлик йиғилиш ўтказди.

Унда Бош вазир Ўлжас Бектегов, Ҳукумат аъзолари, Президент Маъмурияти раҳбарияти ва бошқа расмий шахслар иштирок этди.

Давлат раҳбарига ҳудудлардаги бугунги аҳвол, хусусан, одамларни кутқариш, сув тошқинлари оқибатларини бартараф

этиш борасида амалга оширилаётган чора-тадбирлар ҳақида маълумот берилди.

Президент Ҳукумат ва ҳокимлар фаолиятини танқид қилиб, фавқулодда вазият уларнинг ўз касбий бурчларига лоқайд муносабат туфайли юзага келганини айтди. Давлат раҳбарининг таъкидлашича, Ҳукумат ва маҳаллий ижро ҳокимияти идоралари ўртасида тизимли алоқа йўқ.

Қасим-Жумарт Тўқаев тошқиндан талофат кўрган ҳудудлар аҳолисида юзага келган вазият учун узар сўраб, барча фуқароларга ёрдам берилишини айтди. Йиғилишда Давлат раҳбари

Ақтўбе, Қўстанай ва Ғарбий Қозоғистон вилоят ва шаҳарлари ҳокимлари томонидан селга қарши ўз вақтида чора-тадбирлар кўрмагани учун Бош вазирнинг биринчи ўринбосари Роман Скляр ва сув ҳўжалиги ҳамда ирригация вазири Нуржан Нуржигитовга ҳайфсан эълон қилинди. Ақтўбе, Қўстанай, Ғарбий Қозоғистон вилоятлари ва шаҳарлари қатъий чоралар кўрилиши ҳақида огоҳлантирилди. Атиров, Ақмула, Алматы, Павлодар ва Абай вилоятлари ҳокимларига ҳайфсан эълон қилинди.

Президент тошқин оқибатларини бартараф этиш учун тезкор

ҳаракатлар билан бир қаторда тизимли чоралар кўриш зарурлигини таъкидлади.

Бош вазир раҳбарлигида Республика штабини ташкил этиш, шунингдек, барча минтақаларда селга қарши чораларни кучайтириш ва биринчи навбатда фуқаролар хавфсизлигини таъминлаш вазифаси топширилди. Давлат органларига тошқин натижасида етказилган зарар миқдорини аниқлаш ва эндиликда офатларнинг олдини олиш юзасидан мажмуавий чора-тадбирлар ишлаб чиқиш топширилди.

Akorda.kz

»» Сув тошқини



## ҲАРБИЙ УЧУВЧИЛАР ЁРДАМГА БОРИШДИ

ҚР Қуролли Кучлари Ҳаво ҳужумидан мудофаа кучларининг вертолёт экипажлари маҳаллий аҳолини сув тошқинлари оқибатларидан кутқариш, озиқ-овқат, иссиқ кийим ва дастлабки зарур маҳсулотларни етказиб беришда иштирок этмоқда, дея хабар беради ҚР Мудофаа вазирлигининг матбуот хизмати.

Кутқарув ишлари Ақтўбе, Қўстанай ва Абай вилоятларида олиб бориляпти.

Ҳарбий учувчилар томонидан 222 киши кутқарилиб, кўчирилди. Фавқулодда вазиятлар хизматининг 19 нафар мутахассиси ҳалокат содир бўлган ҳудудларга сафарбар этилди.

Эвакуация марказларига 10 тонналик гуманитар ёрдам ҳосиласи уюштирилди.

Ҳаво мудофаа кучлари ходимлари экстремал шaroитларда кеча-кундуз ишламоқда. Кутқарув ишларига 7та вертолёт жалб этилган.

24.kz

## ҚОЗОҒИСТОН ЖАҲОН МАТБУОТИДА

2024 йилнинг биринчи чораги тугади. Наврўзнинг сўнгги ҳафтасида хорижий нашрларда Қозоғистон ҳақида турли маълумотлар чоп этилди. Жумладан, Президентнинг Боао анжуманидаги иштироки, мамлакатда Хитой брендидаги автомобиль заводи барпо этилиши ва бошқа янгиликлар кенг ёритилди.



The Times of Central Asia: "Қозоғистон Хитойнинг КАИҮ бренди автомобилларини ишлаб чиқаришни бошлайди"

"Қозоғистоннинг Orbis Manufacturing транспорт компанияси Алматы индустриявий минтақасида Хитойнинг КАИҮ бренди остида автомобиллар ишлаб чиқарадиган тўлиқ цикли завод қуришни режалаштирмоқда", деб ёзади нашр.

Агентлик маълумотларига кўра, "Орбис Қазақстан" ҳозирда ишлаб чиқариш линиясининг лойиҳа-смета ҳужжатларини пухталашни якунламоқда. Заводнинг ишлаб чиқариш қуввати йилига 80 минг дона автомобилни ташкил этади. Заводда дастлаб 1500дан зиёд иш ўрни яратилади.

Қозоғистон Президенти Қасим-Жумарт Тўқаев Хитойнинг Хайнань вилоятида ўтган Боао Осиё анжуманида иштирок этди ва фахрий меҳмон сифатида нутқ сўзлади.

Қ. Тўқаевнинг баёноти жаҳон оммавий ахборот воситаларида ҳам ёритилди.

Nova News: "Тўқаев дунёвий озиқ-овқат барқарорлигига ҳисса қўшмоқчи"

Болгариянинг Nova News агентлиги Қ. Тўқаевнинг Боао анжуманидаги баёноти ҳақида ёзди.

"Қозоғистон дунё аҳолисининг учдан бир қисми ҳанузгача бошдан кечириётган озиқ-овқат тақчиллиги масаласини ҳал қилиш учун дунёвий озиқ-овқат хавфсизлигини таъминлашга ҳисса қўшиш зарурлигини таъкидлади ва бу ишга тайёр эканлигини маълум қилди", деб ёзади нашр.

TASS: "Қозоғистон дунёвий озиқ-овқат барқарорлигига таъминлашга ҳисса қўшиш ниятида"

Россиянинг TASS агентлиги ҳам Давлат раҳбарининг Боао анжуманидаги нутқига эътибор қаратди ва маълумот тарқатди.

Daryo: "Қозоғистон ва Хитой ўртасидаги ўзаро товар айирбошлаш ҳажми рекорд даражадаги 41 миллиард долларга етди"

"Президент Тўқаев ўзгарувчан геосиёсий иқлим ва иқтисодий қийинчиликлар туфайли юзага келган дунёвий беқарорлик шароитида Боао анжумани мулоқот ва халқаро ҳамкорлик маркази сифатида муҳим аҳамият касб этишини таъкидлади", деб ёзади Daryo.

24.kz

## ДОРИЛФУНУНДА ТЕЛЕСКОП ЯРАТИЛДИ

Аҳмад Яссавий номидаги университет олимлари томонидан "STEM ва креатив" ўқув лабораториясида телескоп яратилди.

Қурилма таълим муассасаси олимлари томонидан амалга оширилаётган "Муҳандислик-техника йўналишларида STEM таълими асосида талабаларни англиз тилида ўқитиш жараёнини ривожлантириш" грант лойиҳаси доирасида ишлаб чиқилди.

Тадқиқот гуруҳи таркибига: лойиҳа раҳбари – физика кафедраси профессорлари Ш. Раманкулов, Б. Қурбанбеков, ўқитувчилар С. Пўлатули, Н. Жақилик, докторант Қ. Келесбаев, магистрант Я. Каримжанов ва бошқа ёш олимлар кирди.

Олимлар телескопни талабалар билан биргаликда синовдан ўтказишди.



## АСР МУТАФАККИРИ – ХОЖА АҲМАД ЯССАВИЙ

Туркистон шаҳридаги Хожа Аҳмад Яссавий номидаги ХҚТУда ўтган илмий-амалий анжуман шундай номланди. Халқаро тадбир буюк мутафаккир Хожа Аҳмад Яссавий таваллудининг 930 йиллигига бағишланди.

Анжуманни дорилфунун ректори Жанар Темирбекова очди.

– Муқаддас Туркистон шаҳрига хуш келибсиз! Тасаввуф таълимоти тарихига назар солар экансиз, авлиёларга энг бой диёр Туркистон эканлигига тан берасиз. Аҳмад Яссавий – туркий халқлар орасида янги бир тасаввуфий тариқат яратган ва тасаввуф шеърятга асос солган машҳур мутафаккир ижодкордир. Демакки, бу улуг тупроқ, оламшумул аллома, машҳур мутасаввуфларнинг буюк ва муборак туپроғидир. Хожа Аҳмад Яссавийнинг тасаввуф таълимоти тарихида тугган ўрни гоётада улкан, таъсир доираси

жуда кенг эди. Тадбирдан кўзланган мақсад – Хожа Аҳмад Яссавий таълимотини, унинг маънавий меросини бутун туркий оламга таништириш. Улуғ аллома Яссавий бобомиз туркий оламда ислом дини ва туркий тамаддунинг шаклланишида ҳам нақадар муҳим аҳамиятга эга бўлганини зиёлилар унутмаган. Тузумлар, мафқуралар ўзгарган бўлса-да, Яссавий қолдирган бебаҳо мерос саккиз асрдан кейин ҳам ўз қадрини йўқотгани йўқ. Мустақиллик тонгида ташкил этилган университетимиз халқаро мақомга эга бўлиб, Яссавий номини олди. Шу пайтдан эътиборан Туркистонда тўпланган барча зиё-



лилар вакиллари унинг таълимотини тарғиб қилиш, тегишли даражага, юксакларга кўтариш вазифасини зиммаларига олдилар. Бугун анжуманимизга мамлакатимизнинг 13 вилоятдан 140 нафар ўқитувчи ташриф буюришди. Шунингдек, Эрон, Ўзбекистон, Қирғизистон, Афғонистондан Яссавий таълимоти ва ҳаётини ўрганувчи таниқли олимлар ҳам келган, – деди у ва мактаб ўқув дастурига "Яссавийшунослик"

фанини киритиш, ёш авлодни Яссавий таълимоти билан таништириш ва улуглаш ҳақидаги фикрларини билдирди.

Учрашувда Туркистон шаҳар ҳокими ўринбосари Мекенхан Қирқбаев шаҳар ҳокими Нурбўл Турашбековнинг анжуман иштирокчиларига йўллаган махсус табригини етказди.

Тадбир давомида Қозоғистонда фан ходимлари кўнига бағишланган фан ойлиги расман очилди. Анжуман

Эрон Исломи Республикаси Табриз университети доценти Хусайн Хўшбатенининг тақдими билан давом этди. Бундан ташқари, Ўзбекистон Миллий университети олими Нодирхон Ҳасанов ва Қирғизистондан Юсуф Боласоғуний университети илмий ходими Тилек Тўқтосуновлар ҳам маъруза қилишди.

Вилоят ҳокимининг матбуот хизмати.





